

T 2516/7249(8)

CHINESE - JAPANESE LIBRARY
HARVARD - YENCHING INSTITUTE
AT HARVARD UNIVERSITY
JAN 10 1941

CM	0	1	2	3	4	5	6	7	8	9	10	11	12	13	14	15	16	17
Lab D50 2'	95/0/2	81/0/0	66/0/0	51/0/1	35/0/0	20/0/0	29/19/54	55/39/33	42/57/29	82/4/79	51/50/-13	50/-28/-29						
	38/14/16	66/16/18	50/-5/-22	43/-14/21	55/-9/-25	71/-32/0	62/34/60	40/9/43	52/48/17	31/21/-21	72/-23/57	73/19/68						

Harvard College Library Imaging Services <http://imaging.harvard.edu>

通紀全史彙編歷朝傳統

錄卷之八

漢和
珍藏印

長洲

徐燊禧綏祉

鑒閱

吳郡

劉綦履公

纂輯

更名
炳晨

程維均方平

較訂

明紀

明太祖高皇帝

姓朱氏御諱元璋字國瑞先世句容朱家巷人

大父渡淮家泗洲

父諱世珍與

母陳氏徙濠

有四子

帝最少於

元

大曆

元年

戊辰

九月十八

日

日生。生時赤光滿室。上燭於天。里中人競呼朱氏
火起。相率奔救。及至無有也。至正四年。帝年十
七。值旱疫。父母三兄相繼病沒。帝孤立無依。乃
託身皇覺寺。逾月。僧乏食。散遣徒衆。上游江淮
間。崎嶇幾載。仍歸寺中。年已二十五矣。時元政廢
弛。四方兵起。潁州劉福通。蕭縣李二。羅田徐壽輝
等。各擁衆剽掠。定遠人郭子興。與其黨孫德崖等
攻陷濠城。據之。元將徹里不花。憚不敢進。惟日掠
良民爲盜。以邀賞。人無生路。帝乃禱卜伽藍神。

惟從雄吉。遂入濠。見子興。子興與語。大悅。留參謀
議。日益親信。遂以孝慈皇后配之。后姓馬氏。子
興養女也。上於是在甥館。軍中號曰朱公子。

帝恩威日著。李善長徐達湯和等。率先歸附。姊子
李文忠。年十二來歸。定遠人沐英方十歲。帝憐
之。賜姓朱氏。養以爲子。有民兵號驢牌寨者。欲降
未決。上矍然曰。此幾不可失。病中強起。請行。遂
降之。得壯士三千人。後七日。率所降夜襲元知院
老張於橫澗山。降其民兵男女七萬。得壯士二萬

傳錄金
人七月攻滁州。下之。子興意欲建都於此。上謂
滁一山城。非形勝不可居。乃與張天祐湯和計取
和陽。辛巳。元兵十萬來攻。上以萬人拒守。連兵
三月。屢出奇破之。子興稱滁陽王。子興卒。上統
其軍。時趙普勝廖永安俞廷玉以水師來附。上
曰。方謀渡江。而湖中水軍至。吾事濟矣。乙未。六月
朔。遂率徐達等引帆向牛渚。頃刻及岸。守者皆驚。
鎮兵大潰。遂拔之。采石兵亦潰去。緣江諸壘。望風
迎附。於是乘勝取太平。寘太平與國翼元帥府。諸

將奉。上爲大元帥。丙申。三月朔。進取集慶路。得
軍民五十餘萬。上入城。召父老慰諭。謂徐達曰。
金陵險固。所謂長江天塹。真形勝地也。倉廩實。人
民足。吾今有之。諸公又能同心協力。以相左右。何
功不成。乃改集慶路爲應天府。發兵取鎮江。七月
朔。諸將奉。上爲吳國公。置江南中書省。進取寧
國徽州。又進取蘭溪。至婺州。六月。上自寧越還
應天。先遣將常遇春胡大海取衢處等州。庚子。取
信州。徵青田劉基。龍泉章溢。麗水葉琛。金華宋濂。

命有司創禮賢館以處之。辛丑，議立鹽法、茶法，置寶源局鑄錢。癸卯八月，與陳友諒戰於鄱陽湖，常遇春等與之聯舟大戰，乘風縱火，湖水盡赤，焚賊舟三十餘艘，軍威大振。友諒欲退保鞋山，我師先至罌子口，橫截湖面，遂其歸路，轉戰數十合。友諒中流矢，貫睛及顱而死。其將張定邊與其子理逃歸武昌。甲辰正月，諸將奉 上卽吳王位，建百司官屬，帥諸將復攻陳理，理銜壁肉袒降。乙巳八月，置國子學於應天府。初 上借用韓林兒龍鳳年

號。至是丁未，以國號建元爲吳元年。徐達常遇春圍蘇州，張士誠困守旣久，被執，檻送建康。士誠閉目不食。 上欲全之，士誠自縊死。自是江南諸郡悉入版圖矣。十月，命徐達爲征虜大將軍，常遇春副之，北取中原。馳檄諭齊魯河洛燕薊秦晉諸處。十一月，命中書省詳定律令。頒戊申曆。戊申正月四日乙亥，祭告天地，卽皇帝位，定有天下之號曰

大明。建元**洪武**。以土德王，色尚黃，恭詣太廟，追尊四代考妣，皆爲帝后，立妃馬氏爲皇后，立世子

傳錄金 四
標爲皇太子。定衛所官軍。及將帥將兵之法。戊寅。居新宮。湯和將兵征南。執延平陳友定。廖永忠至廣東。降元。左丞何真。并取廣西。而潼關以東。皆不煩兵而定。上命諸將進取元都。徐達檄諸將大會於臨清。馬步舟師並進。遂克通州。元主聞報大懼。集三宮后妃太子。同議避兵北行。忽有二狐自殿上出。元主嘆曰。宮禁嚴密。此物何得至此。殆天所以告朕。朕其可留哉。夜半。遂開建德門去。如上都。徐達等攻濟化門。填濠登城而入。封其府庫圖。

藉寶物。人民安堵。市肆不移。先是元主常召術士。問以國祚。對曰。千秋萬歲無疑。唯日月並行。乃可憂耳。至是元亡。蓋日月並行。乃明字隱語也。詔以汴梁爲北京。金陵爲南京。設六部官屬。上北巡。命李善長劉基留守。詔禁元俗。悉復昔日衣冠之舊。元都旣克。元將張思道。李思齊。王保保等。猶分據秦晉。以次平之。海外諸國。俱遣使朝貢。二年。封

建十王。

桀爲秦王。桐爲晉王。棣爲燕王。輔爲周王。楨爲楚王。樽爲齊王。梓爲潭王。杞爲魯王。

檀爲蜀王。姪孫守謙爲靖江王。

皆授以冊寶。設置官屬。開科取士。

定科舉格爲三場。初場始用四書及經義。四月李
文忠將兵出野狐嶺。進襲應昌。知元主已殂。元太
子愛猷識聖達臘僅脫身遁。獲其子買的里八喇。
至京師。封爲崇禮侯。朝廷遂空。屢免山東河南北
平三省及應天太平等處稅糧。戶部奏蘇州連逋
三十餘萬。請論守臣罪。上曰。蘇州歸附之初。軍
府之用。多賴其力。今積二年不清。民困可知。悉免
其所逋。大封功臣李善長徐達等三十六人。追封
故功臣馮國用等四人。各隆殺有差。命釋奠孔子。

親製樂章。十年冬。皇孫允炆生。十三年。丞相胡
維庸等謀逆。伏誅。二十五年。皇太子薨。謚曰懿
文。上以子孫蕃盛。命名慮有重複。各擬二十字
爲一世。其下一字。則臨時定議。以爲二名。編入玉
牒。曰。高瞻祁見佑。厚載翊常由。慈和怡伯仲。簡靜
迪先猷。二十六年。涼國公藍玉恃功橫暴。上廷
鞠得實。殺之。時株連者無算。三十年。會試天下貢
士。學士劉三吾等閱卷不公。詔以三吾謫戍邊。餘
皆凌遲於市。三十一年。上不豫。閏五月乙酉崩。

於西宮壽七十一歲葬孝陵廟號太祖皇子共二十四人懿文太子早卒皇太孫卽位是爲

建文皇帝

明建文皇帝

御諱允炆已卯改元建文在位四年時諸王各擁重兵地嫌勢逼乃草遺詔諸王哭臨唯在本國燕王入臨將至淮安齊泰言於帝令人齎敕勒使還國慟哭而去七月召漢中府學教授方孝孺爲翰林學士尋陞侍講遵太祖之命也初帝憂

諸父強與齊泰黃子澄密謀泰以燕王數將兵有威名欲先去之則他藩自懼子澄以周王數多過失且燕之母弟去周則燕勢孤可圖乃命李景隆襲執周王下燕議其罪燕王與辭以答帝將赦之二人持不可遂廢周王爲庶人遷之雲南未幾代王桂湘王栢齊王榑岷王梗皆得罪勢且及燕帝意猶豫泰曰今北虜未靖但以防邊爲名調精銳出塞去其羽翼無能爲矣不於此時取之更何所待元年四月高皇帝小祥燕王率世子兄

弟三人入朝行皇道不拜。帝不問，尋辭還。六月，燕王護衛百戶倪諒告燕陰事，有詔責讓燕王，佯狂稱疾。又有百戶鄧庸言燕將舉兵，狀齊泰等即遣使往逮燕府官屬，密令謝貴張昺圖燕，兵逼王城。七月五日癸酉，王乃誓師，告以不得已起兵之意，號曰靖難兵。與僧道衍定計。道衍，蘇州人，姓姚氏，名廣孝。忽有檐瓦墮地，碎燕王不懌。道衍曰：天欲殿下，易黃瓦耳。遂以計縛貴昺，命張玉率諸將夜攻九門，俱下。時遣將北征。帝誠之曰：昔蕭繹舉兵入京，曰：

一門之內，自極兵威，不仁之甚。今爾將士與燕王對壘，務體此意，無使朕負殺叔父名。始命耿文炳出師不利，乃以李景隆代之。屢戰多敗，燕王乘勝入德州、濟陽等郡，遂至臨清、東昌。大將盛庸背城而陣，具列火器藥弩以待。麾兵圍燕王數重，燕王易服躍馬而出。三年正月，靖難兵南下，與盛庸大戰夾河。北方諸郡無不披靡。四年五月，靖難兵渡淮，詔天下勤王。又以蠟書四出，趣援兵為燕騎所獲。帝從孝孺議，命慶成郡主往請割地分南北。

燕王笑曰。直緩我耳。行將與諸弟妹相見。無多言也。六月乙丑。靖難兵薄金川門。帝手誅徐增壽。以迎降之議。自增壽倡也。十二日。大內火起。皇后馬氏暴崩。方孝孺哀杖哭闕下。或曰。帝倉遽不知所出。諸內臣譁言。不如遜去。忽有一官捧太祖遺篋至。曰。曩受命嬰大難。則發發得楊應能度牒。及緇衣剃刀。程濟曰。數也。可奈何。立召主錄僧溥洽爲上剃髮。從水關出。宮中火烈甚。傳言上崩。而實遜去。先入蜀。入滇。嘗往來貴州諸寺。

中。[正統]庚申。出滇南。語寺僧。我

[建文]皇帝也。寺

僧大懼。白官府。以聞於朝。乘傳至京師。則老僧也。寓大興隆寺。命經侍太監吳亮審視。一見亮。卽曰。吳亮耶。亮曰。非是。曰。我御便殿食子鵝。遺片肉於地。汝戲餌之。豈遽忘乎。亮伏地哭。不能仰視。於是迎入大內。號稱老佛。以壽終。葬西山。不封不樹。

[建文]帝遜去後。帝位虛三日。已巳。燕王謁孝陵。還。革去[建文]年號。仍稱[洪武]三十五年。卽皇帝位。是爲成祖文皇帝。

明成祖文皇帝

帝高皇帝第四子也。御諱棣。金川門破。按兵入城。文武望塵迎附。榜列奸臣齊泰黃子澄等五十餘人於朝堂。方孝孺聞宮中自焚不屈。召之。卽衰經入見。哀聲徹殿陛。帝曰。予欲效周公輔成王耳。孝孺曰。成王安在。帝曰。渠自焚死。孝孺曰。何不立成王之子。帝曰。先生母太苦。此吾家事耳。因授筆。強之草卽位詔。孝孺投於地。哭且罵。上大怒。命夷十族。親故坐死者八百餘人。而以奸黨

鈎連瓜蔓死者不可勝算。詔復周王齊王等爵。大封功臣。以淇國公丘福第一。癸未改元永樂。二年。冊立世子高熾爲皇太子。三年。命學士解縉等選新進才識英敏者。俾就文淵閣進其學。凡二十八人。庶吉士之選自此始。五年。張輔佩征夷將軍印。平安南。先後諸番朝貢不絕。命設四夷館待之。前所未嘗通中國者。悉梯航而至。七年。二月。車駕巡幸北京。命皇太子監國。惟文武除拜。四夷朝貢。邊境調發。上請行在。餘常務。悉啓聞處分。命淇

國公丘福北征本雅失里敗績八年二月命皇
 長孫留守北京親征北虜三月車駕出塞至清
 水源又次凌霄峰四月至玄石坡勒銘五月至幹
 難河本雅失里率眾拒戰上麾前鋒迎擊一鼓
 敗之失里棄輜重牲畜遁去六月班師七月車
 駕至北京十月還南京弛齊黃奸黨之禁復巡幸
 北京皇太孫從十二年三月車駕發北京親
 征瓦剌時瓦剌與太平把
 秃孛羅二酋叛帥眾逆我軍連大敗之
 八月還北京十四年十月上還南京十五年漢

王高煦有罪徙之山東安樂州上又巡北京時
 上屢出皇太子監國距隔數千里小人陰附
 漢府者讒構百端上頗疑太子適左侍郎胡濙
 巡江浙諸郡上面諭曰人言東宮所行多失當
 至南京可多留數日試觀何如密奏來濙以所見
 皆誠敬孝謹七事密奏上覽大悅自是不復疑
 十八年立東廠命內官一人主之刺大小事以聞
 北京宮殿成以應天為南京改北平府為北京遂
 移都之十月皇太子赴北京十九年上御北

傳統錄
京奉天殿受朝賀命皇太子詣天地壇皇太
孫詣社稷壇安奉天地百神之主二十年三月
上以北虜攜貳決意親征駕及雞鳴山虜聞之
夜遁四月次龍門雲州閱兵五月駐蹕獨石六月
次玉泉七月次殺胡原阿魯台聞車駕親征大
懼上麾兵進擊斬首數百級餘衆潰走追奔數
十里抵其巢穴擒斬無算遂班師九月車駕至
京師二十一年七月車駕復北征九月次沙城
十月次上莊堡十一月駕還京師二十二年四

月車駕發北京復親征胡寇五月次清鎮復次
清水源阿魯台遠遁六月次答蘭納木兒河彌望
惟荒塵野草虜隻影不見先鋒陳懋金忠引兵抵
白邨山下咸無所遇以糧餉不繼乃命班師七月
駕次翠微岡十六日巳丑次蒼崖戌上不豫
次日次榆木川上大漸遺命傳位皇太子十
八日辛卯上崩八月楊榮等奉大行訃問至
京太子慟哭幾絕乃遣太孫迎之初十日
梓宮至京師帝銳意圖治寬嚴兼濟仁儉性成

傳錄金
萬幾之暇。纂輯寶訓。事事可法。始與學士解縉黃
淮胡廣楊榮楊士奇金幼孜等。講論不輟。開拓雲
貴。削平交南。三犁漠北。尤見戡定大略。在位二十
二年。壽六十五歲。葬長陵。廟號太宗。嘉靖中追
尊曰成祖。皇太子嗣位。是爲仁宗。

明仁宗昭皇帝

御諱高熾。乙巳改元洪熙。帝居東宮久。監國南
京。政務已熟。軍國之事。無不練達。聞成祖之訃。
哀痛迫切。呂震請從漢制。以日易月。上力持不

可。自是臨朝素服。退則衰經。卽位後。復夏原吉官。
赦解縉妻子還鄉。及靖難不屈諸人族屬。並放還
家。給還田里。謂侍臣曰。方孝孺輩。皆忠臣也。宜從
寬典。元年。除誹謗禁。命北京諸司悉加行在二字。
上時決意復都南京。故云。委任大臣楊士奇楊
榮楊溥等。捐租薄賦。天下頌爲仁主。漢王高煦子
瞻圻。父子讒構。帝遣守鳳陽皇陵以愧之。寧王
權奏欲來朝。又言江西非其封國。上璽書慰答。
憚不敢動。上明於天象。忽夜見星變。召楊士奇

等曰天命盡矣乃嘆息而起明日復語曰朕監國
十餘年被讒艱危吾與三人共之

楊士奇蹇義夏原吉

朕去

世後孰知卿等之雅各賜一印篆曰忠貞上泣

然三人亦流涕五月十一日上不豫命士奇書

勅遣中官海壽馳召太子於南京次日上疾

大漸傳位皇太子遂崩壽四十八歲時以太

子未至不發喪羣臣請鄭襄二王監國六月初三

日太子還自南京始發喪廟號仁宗葬獻陵

十二日皇太子即位是為宣宗

明宣宗章皇帝

御諱瞻基丙午改元宣德元年八月漢王高煦反

上親征討平之煦為成祖次子少不喜學恃

力驕橫靖難兵起煦與有功成祖嘗撫之曰世

子久疾事成當以汝為東宮勉之後封國雲南快

快不肯去曰我何罪黜萬里外時暫留京師請得

天策衛為護衛遂大言曰天策上將唐太宗之號

也此豈偶狀後改國青州曰瘠土又不肯行益選

各衛壯軍隨侍教習武事造作器械成祖怒詔

傳錄
徒樂安。促卽日行。日懷怨望。至是煦遣枚青來京。潛約英國公張輔內應。輔繫青聞於朝。御史李濬亦間道詣京。言煦刻日取濟南。帝欲出不意擊之。辛未發京師。駕至樂安。約明日大戰。城中人多欲執獻煦者。煦大懼。遂潛從間道出。爲邏騎所執。乙酉。班師。械煦至京。鎖繫大內逍遙城。一日上往觀之。高煦忽伸一足。勾上仆地。上大怒。命壯士舁銅缸覆之。缸重三百斤。高煦有力。負之輒起。積炭其上。逾時火熾。銅鎔。高煦死。車駕還

京時。有以趙王慮者。謀襲執之。楊士奇力諫。乃止。王亦上表謝恩。而言者始息。初。成祖平交趾。求陳氏後。不得。分爲郡縣。叛服不常。連歲用兵。至是黎利進。安南王三世孫。高表乞立爲陳氏後。帝從。楊士奇議。冊高爲王。罷征南兵。三年。冊長子祁鎮爲皇太子。八月。帝第二子生。是爲郕王。帝以是時秋高馬肥。恐胡虜擾邊。欲親歷諸關。警飭兵備。車駕發京師。至喜峰口。守將報胡騎侵邊。已入塞下。帝遂出喜峰口。馳四十里。命分鐵

騎爲兩翼夾擊之。虜望見黃龍旗始知。上親征。悉下馬羅拜。請降。皆生縛之。斬其酋渠。遂班師。謁告太廟。論功行賞。五年。安南黎利復篡陳暘而自立。遣使謝罪。請封。朝臣或請興師討之。上不許。遣使封利爲安南國王。自是朝貢不絕。十月。車駕巡邊。至雷家站回鑾。六年。上幸楊士奇宅。士奇俯伏言。昏暗中誰識至尊。萬一或有識者。變起倉卒。何以備之。明日。士奇不謁謝。上使人詰之。對曰。車駕夜出。愚臣追今。中心惴慄。未已。豈

敢言謝。後旬餘。獲盜之伺。車駕者。上嘆士奇言不虛。自後不復微行。十年。正月。上不豫。初三日。上崩。壽三十七歲。葬景陵。時太子方九歲。內議頗有欲立長君之說。大臣楊士奇、楊榮、張輔入臨畢。請見太子。卽叩頭呼萬歲。羣臣亦隨呼萬歲。初十日。皇太子卽位。是爲英宗。

明英宗睿皇帝

御諱祁鎮。丙辰改元。正統。帝冲年卽位。太皇

太后張氏同聽政。三楊士奇輔之。以東宮舊侍王

榮溥

榮溥

振為司禮監太監。二年春，太后御便殿，召張輔、楊士奇等，慰勞甚切。頃間，宣王振至，俯伏。太后顏色頓異，曰：汝侍皇帝起居，多不律，今賜汝死。

上跪為之請，久之乃已。正統初年，政治極盛，皆

太后之力也。六年，詔北京各衙門除行在之稱。

平麓川賊思任發，及維摩賊韋郎羅。

郎羅，僭稱七廣新王。

年十月，太皇太后崩。十年三月，廷試，以浙江淳

安縣人商輅為第一。我朝中三元者，唯輅一人而

已。十三年，福建沙縣民鄧茂七反，僭稱閩王。處州

賊葉宗留反。十四年，貴州湖廣苗反，時寇起勢熾，

東南震駭。承平日久，民不識兵革，賴兵部尚書王

驥等以次討平之。七月，北虜也先大舉入寇，大同

失利，城堡陷沒。王振不與大臣議，挾天子帥師

親征，百官伏闕懇留，不聽。十七日，駕行，命太監

金瑛輔皇弟郕王居守。英國公張輔、成國公朱

勇率官軍私屬共五十餘萬，出居庸關，連日風雨，

人情洶洶，敗報踵至。文武上章阻駕者，振怒，皆

命掠陣。天文生彭德清曰：虜勢如此，不可復前。倘

有疎虞陷 天子於草莽振詈曰設有此亦天命也八月戊申朔 駕至大同雷雨暴作振始懼庚戌班師奉 駕東還振蔚州人欲邀 駕至其第後不果行四十里復轉而東初十日至宣府虜出沒甚衆遣恭順侯吳克忠為後拒克忠力戰陷沒十四日至土木去懷來城僅三十餘里振以輜重千輛在後留待之虜已合圍十五日 上與親兵乘馬突圍不得出遂下馬據地坐虜擁以去大臣張輔鄜埜等數百人皆死也先奉 上居伯顏帖

木兒營衆欲加害伯顏帖木兒

也先弟

憤怒罵曰

大明皇帝自雲端裏坐墮下亂軍中一無所傷大福未可量且我等曾受重賞只宜報京送回圖好名留書史上此狗輩惡言違天犯順不可從也先朕之 帝被留十六日報至京師大震十七日百官集闕下遣使賫重寶文綺請還 車駕十八日

皇太后詔百官入議命郕王權國事立長子見

深為 皇太子

時年二歲

仍命郕王為輔代總庶政撫

安天下時王振已死北廷九卿科道交章劾振擅

傳錄金
權誤國之罪。因慟哭。聲徹中外。于謙言振傾危社稷。不卽滅族。百官死不敢退。有旨籍振家。錦衣衛指揮馬順叱百官且去。衆曰。順振黨也。給事中王竑。捽順髮。嚙其面。衆爭毆之。蹴踏分裂。頃刻立斃。又索振黨王毛二人。亦擊殺之。百官惶懼不自安。于謙啓王降旨。獎諭衆心始安。明日。移王座入奉天門。漸有卽真之議。九月六日。奉太后命。遙尊上爲太上皇帝。郕王卽皇帝位。是爲景皇帝。

明景皇帝

御諱祁鈺。庚午改元。景泰時。北兵出入不常。時挾上皇往來紫荆大同間。不絕也。先屢欲謀害。忽大雷雨。震死也。先所乘馬。逆謀乃沮。又令人行刺其人。見一大蟒蛇。遶護帳外。畏怖而去。繇是遂加敬禮也。先邀上皇至營中。必稽首侍坐。宰馬設宴。出其妻妾。以次奉酒。居伯顏營亦如之。每二日獻羊。七日獻牛。或馬。逐日進牛乳馬乳。二人每出獵。必有所貢。時朝廷雖已有主。而人無固志。侍講徐瑄倡南遷之議。太監金英叱之于謙。上言。京師

傳錄金
天下根本一動則大勢盡去。固守之議始決。分命大臣各關鎮守。時有內侍喜寧者。隨上皇陷虜。寧懷二心。數教也先擾邊。上皇深惡之。及是袁彬與上皇謀。遣寧傳命入京。令軍士高磐與俱。密繫書磐髀間。令至宣府計擒之。縛至京師。伏誅。自寧既誅。虜失其鄉導。稍稍厭兵矣。是歲都督董興等大破廣州賊黃蕭養。誅之。北虜屢因邊將遣使請和。上頗不樂。迎復之名曰大位。是卿等要朕爲之。非出朕心。于謙曰。大位已定。孰敢有議。但

答使盡禮。紓邊患耳。於是議遣禮部左侍郎李實等往。實至。與也先語。復引見。上皇。上皇泫然淚下。實因與也先言來迎之意也。先曰。皇帝勅書內。只說議和。不曾說接。駕如今送去。豈不輕易了。務要差大臣來迎。我便送去。復再三言之。實等回奏。帝不允。先是也先主脫脫不花。普化可汗。亦遣使議和。朝廷使右都御史楊善等往報。道遇李實。告以虜情。八月二日。善等至也先。甚喜。許送。上皇還京。次日邀上皇至其營。餞行也先。

自彈琵琶善等亦侍飲不敢坐也先顧羨曰中國
好禮數明日伯顏設宴亦如之初八日上皇駕
起也先率衆羅拜而別伯顏率兵護送十一日至
野狐嶺伯顏等慟哭曰皇帝去矣何時復得相
見良久始別去十四日上皇至懷來迎復儀禮
猶未定胡濙獨詳注送內閣十五日 上皇至唐
家嶺遣使回京詔諭避位免羣臣迎十六日百官
迎於安定門 上皇自東安門入 上迎拜 上
皇答拜拜畢相抱持而哭各述遜避意乃送 上

皇至南宮羣臣就見而退嗣後正旦不朝恩禮漸
薄三年改封 皇太子爲沂王自立其子見濟初
上欲易儲語太監金英曰七月初二日東宮生
日也英叩頭曰東宮生日是十一月初二日上
爲之默然蓋 上所言者乃見濟英所言者謂
上皇長子也四年十一月太子見濟卒八年正月
帝不豫時儲嗣未定中外憂懼僉謂 上皇子
宜復立惟王文之意不然乃合奏請早建元良以
安人心左都蕭維禎請更建字爲擇字衆從之奏

上。不允。衆咸謂擇之一字。非復立之意。於是京師競傳王文于謙已遣人齎金符。取襄王世子矣。石亨知病必不起。密與張軫。徐有貞等謀復。上皇有貞曰。上皇前者出狩。非以游畋爲赤子故耳。今天下無離心。計當出此。十六日薄暮。亨等收諸門鑰。開門納兵。時已漏下四鼓。天色晦冥。衆皆惶惑。有貞大言曰。時至矣。勿退。遂薄南宮城。門錮甚牢。密叩不應。有貞命取巨木架懸之。數十人舉撞城門。又令勇士踰垣入。與外兵合毀垣。垣壞。門啓。黯無燈火。軫等入見。上皇燭下獨坐。問曰。爾等何爲。衆俯伏。合聲請。陛下登位。乃呼兵士舉。有貞等自挽以行。忽天色昭朗。星月輝光。上皇顧問卿等爲誰。各以姓名對。至奉天門。門者呵止之。上曰。朕太上皇帝也。門者不敢禦。遂升奉天殿。登御座。初文武羣臣。約是日候。景帝出視朝。聞南城呼譟聲。不知其故。須臾鐘鼓大鳴。有貞等號於衆曰。上皇復位矣。趣入賀。百官震駭。就班呼萬歲。以太后旨。廢景帝復爲郕王。十九日。

三

癸丑。郟王薨。諡曰戾。葬金山。

按王鏊曰。英廟北狩蒙塵。虜人悔禍。旋奉駕

歸。此自古之所無也。固本朝國勢之強。亦人事

有以中其機會。是時郟王監國。不欲急君。邊人謝

之曰。中國有主矣。虜人抱空質而負不義於天下。

所以汲汲來歸。蓋合鄭公孫申之謀也。春秋時。晉

鄭將改立。示不急君。晉遂歸其君以求成。

明英宗睿皇帝復位

景泰八年丁丑。改元天順。四月。復立元子為皇

太子。以迎立外藩為名。殺于謙。王文等數人。獄成。

上猶豫。良久曰。于謙曾有功。眾未及對。有貞即

前曰。不殺謙。今日之事為無名。上意遂決。其實

金符仍在禁中。迎立之事未發也。論奪門功。石亨

張軏。楊善。徐有貞等。封公侯伯。有差。土木之難。言

官劾王振擅權誤國。或謂今陷虜中。反為虜用。親

戚並坐誅夷。第宅沒官。至是振黨以聞。上以親

見振死。大怒。追責言者。過實皆貶竄。復王振官。刻

木肖像祀之。石亨。曹吉祥。恃功恣橫。占奪民田。御

史張鵬楊瑄等劾之。亨疑有貞等指使，下錦衣衛鞠訊。會是日雷電大作，雨雹如注，大風拔木，水深數尺。翌日即赦出有貞等。七月復下有貞獄，發雲南金齒爲民。張鵬楊瑄謫戍南丹。二年赦建庶人出居鳳陽。庶人。建文帝次子也。庶人入高墻時方二歲。至是年五十六矣。出見牛羊亦不識。未幾庶人卒。懿文太子及建文帝皆無後。三年石亨貪恣日甚，潛謀不軌。其姪定遠侯石彪以罪誅，詞連亨。於是下亨獄死。五年曹吉祥謀亂，并其姪曹欽伏誅。令冒報迎駕功陞官者，自首改正。於是改正者四千

餘人。時都指揮門達有寵，惡袁彬質直不阿，使邏

卒撫彬陰事上之。下獄拷掠。

袁彬者。上陷虜時從難。與小校哈銘俱

以忠謹見信者也。

有採漆匠楊暄憤然不平，擊登聞鼓疏

救。上令達逮問。達逼暄供，令李賢指使。暄佯諾

乞廷鞠，對衆宣言。達信之。會法司共訊。暄厲聲曰：

與李閣老何與。此實門指揮教我扳指也。達失色。

計沮。彬亦得從輕調。八年正月。上不豫。十七日

崩。帝復位八年。前後共在位二十二年。北狩一

年。居南宮爲太上皇六年。壽三十八歲。葬裕陵。

皇太子嗣位。是爲 憲宗。

明憲宗純皇帝

御諱見深。乙酉改元**成化**。帝貴妃周氏所生也。卽位之明日。議上兩宮徽號。太監夏時倡言。錢皇后久病。只宜尊所生母李賢彭時等力爭之。始以並尊之說進。後草詔。賢等復曰。同尊固好。朕須有分別。乃於 錢太后加慈懿之稱。而貴妃止稱曰。皇太后焉。四年。 錢太后崩。命大臣議葬所。衆相視莫敢先發。彭時曰。此一定之禮。無可議者。

梓宮當合葬裕陵。神主當祔廟。尚書姚夔贊之。已而 上召諸臣面議。大學士商輅曰。外議洵洵。若不合葬。則人心不服。且於聖德有虧。 上默朕良久。彭時曰。莫若安厝於左。而虛其右。以待後來。則兩全其美矣。 上意始釋。六年七月。皇子生。母妃紀氏。既有娠。萬貴妃知而忌之。百方逼辱。胎竟不墮。 上令托病別居。至是誕育西內。廢后吳氏保抱惟謹。不使萬貴妃知。卽 孝宗皇帝也。 上留意玩好。有言**宣德**間。曾遣王三保至西洋等

番所獲珍寶甚多。命內侍至兵部查簡三保至西洋水程舊案。劉大夏時爲車駕司。先入庫中簡得之。藏匿他處。都吏再三簡之。不得。遲數日。會科道連章諫止。其事遂寢。人以爲大夏所全實多云。十年。詔復 郕王帝號。謚爲 恭仁康定景皇帝。十一年。皇妃紀氏薨。時萬貴妃知皇子已生六歲。具服進賀。厚賜紀氏。不踰月。紀氏受萬貴妃觴。遂病不起。京師傳言不一。商輅引宋李宸妃故事。得謚贈。殯殮悉如禮。十三年。置西廠。命太監汪直提督。

其事直先爲昭德宮內使。年小便黠。上顧寵任之。命出外伺察物議。自是大小政事。方言俚諺。悉以上聞。一時羅織甚衆。朝臣皆重足而立。命直監督十二團營。直遂妄報邊警。監督巡邊。冒功生事。威勢震赫。十八年。罷西廠。十九年。上微知汪直之奸。降直爲奉御。直黨王越。陳鉞。工部尚書戴縉。俱貶削有差。二十三年。八月。己丑。上不豫。命太子暫視朝於文華殿。己丑。上崩。壽四十歲。葬茂陵。皇太子嗣位。是爲 孝宗。

明孝宗敬皇帝

御諱佑禋。戊申改元弘治。詔集議祧廟。國朝

德祖至。英宗九廟已備。建文二帝不與景泰及憲

宗山陵畢。神主將升祔。於制當祧。乃集羣臣議。

禮部尚書周洪謨等以爲。德祖視周后稷。太

祖視周文武。皆百世不祧。懿祖熙祖之父以下。

當以次祧遷。今憲廟升祔。當祧懿祖。宜於

太廟寢殿之後。別建廟藏之。每歲暮合享。則奉祧

主出居舊位。以應古祫祭之制。上從之。元年開

經筵。優禮講官。賜讌。上呼爲先生而不名。四年

十一月。徙興王封於安陸。肅宗舊藩十七年。太皇太

后周氏崩。初。成化間。大學士彭時等議欲合葬裕

陵。實權宜之說。上曰。錢太后。乃皇祖冊立

正后。我朝祖宗以來。惟一帝一后。今若並祔。乃

從朕壞起。恐後來雜亂無紀。且曰。行之。則禮有未

安。不行。恐違先帝之意。狀先帝固重。而祖

宗之制。尤爲重。於是翁狀稱得禮云。時邊報頗急。

上欲親征。大學士劉健以爲不宜輕動。上納

之師乃不出。上親賢遠佞，日與劉大夏、劉健、謝遷、戴珊、馬文升等商確政務，樂聞讜言。戶部主事李夢陽以言事得罪下獄，上不從法司議，徑批旨令復職。一日謂大夏曰：「夢陽本內事，關戚畹，左右言宜付錦衣衛，撻以釋之。朕揣此輩意，欲得旨下，便令重責致死，以快宮中之意，使朕受殺直臣之名。左右不忠如此。」十八年五月，上不豫，急宣劉健等至寢殿，曰：「朕爲祖宗守法度，不敢怠荒。凡天下事，先生每多費心，因執手若將永訣者。又曰：東宮聰明，但年幼，好逸樂，先生每勤請他讀書，輔他做個好人。」上崩，壽三十六歲，葬泰陵。皇太子嗣位，是爲武宗。

明武宗毅皇帝

御諱厚熜，丙寅改元。正德命太監劉瑾掌司禮監事，并提督團營兵馬。瑾爲東宮舊侍，與馬永成、谷大用等日導上以擊毬、走馬、鷹犬、俳優諸事。劉瑾通文墨，性尤剛狠，內閣劉健及科道各部官交章論之。上怒，立命瑾入掌司禮監，悉以天下章

奏付瑾剖斷。徑自私第批出發落。逮問枷責。百官人人自危。日候其門。科道部屬以下。皆行跪禮。於是馬文升等相繼罷斥。而李夢陽、徐禎、劉大夏、楊一清等。類年貶謫。先朝顧命大臣。無復在朝。廷矣。二年八月初十日。肅皇帝生於興府。是歲黃河清。慶雲見。五年四月。宗室安化王寘鐸反。以誅瑾爲名。刻期渡河。關中大震。起復楊一清爲提督。襲執寘鐸父子。賊黨悉平。劉瑾謀不軌。伏誅。瑾擅政五年。激變寧夏。卽寘鐸心不自安。陰謀不軌。乘

兄劉景祥會葬。欲爲變。張永等發其謀。命法司廷鞠。得實。凌遲處死。諸被害者。爭取其肉啖之。抄沒財產。黃金三百萬。白金千萬。六年七月。劉六、劉七、齊彥名等作亂。劫掠畿輔州縣。劉六、霸州文安人。與谷大用、馬永成同鄉里。因混入禁內。縱觀上。游幸之所。都御史甯杲逼逐之。遂聚衆拒捕。擒獲彥名。監之。劉七率衆劫獄。旬日間。聚至數百。所在響應。橫行北方。京師戒嚴。其黨趙風子等。分掠河南、山東。勢且南下。攻徐、宿等州。破舞陽、寶豐諸縣。

七年入洋子江下南京上九江凡三往來如入無人之境八月劉六等舟至通州狼山遇颶風大作舟覆賊盡死又聽近臣計調邊軍入衛大同游擊江彬得入京遂有寵於上八年設皇莊皇店楊一清力言其不可弗聽上於西內練兵江彬等率兵入習騎射或時為角觝之戲上戎服臨之彬等日狎昵上常留宿豹房與彬等同卧起或親搏虎為樂賜江彬及許泰劉暉錢寧俱姓朱氏與優人臧賢表裏弄權諸司章奏多阻隔不上且

導上出宮微行遊獵近郊於是巡幸無時矣十

二年正月上獵於海子三月至石涇山湯峪山

玉泉亭數日乃還石涇山寺朱寧所營建邀上幸焉八月上出

居庸關至懷來宣府等處游獵九月幸大同陽和

衛城韃靼猝至被圍諸將擊却之十二月帝還

京封江彬為平虜伯許泰為安邊伯十三年正月

上復出關遊幸二月以太皇太后崩上始

還京四月上以太后梓宮將耐葬親詣天壽

山祭告六陵遂往黃花鎮密雲等處五月上還

京六月。上復議北巡。自稱威武大將軍太師鎮國公朱壽巡邊。又以江彬爲威武副將軍。扈從以行。上欲內閣草敕。梁儲力持不可。流涕願就死。上察其誠。別命楊廷和草之。七月。出渡居庸關。歷宣府大同榆林等處。車駕所至。貴近先掠良家女子以充幸御。至數十車。在道日有死者。左右不敢聞。時往返數千里。皆輕騎戎裝。冒風雪以行。有司具輦。却弗御。十四年二月。還京師。三月。有旨南巡。時上意欲巡視泰岱。歷徐揚。抵南京。下蘇

浙。浮江漢。登武當。且遍觀中土繁麗。大臣科道交疏諫。上大怒。廷杖貶謫者甚衆。死者十餘人。六月。寧王宸濠反。殺巡撫孫燧。按察許逵。遣兵攻破南康九江府。又進攻安慶。錢寧臧賢。上所極愛幸者。俱與之交通。南贛都御史王守仁起兵討之。解安慶圍。宸濠兼程還。守仁趣各哨兵迎擊之。遇於王家渡。衆軍會戰。賊衆敗走。宸濠懼。退保樵舍。盡出金寶犒士。死戰守。仁令以小舟載柴。乘風縱火焚之。賊遂奔潰。宸濠爲兵士所執。時京師尚未

傳新金
報捷。八月。下詔南征。九月。上發京師。守仁將獻俘闕下。張忠朱泰等謂當縱之鄱陽湖。俟上親與之戰。而後奏凱論功。連遣人迎至廣信。守仁不聽。時江西已寧。上至南京。張忠等率官軍萬餘人。至江西。勦捕餘黨。搜求微隱。羅織平民。不勝其擾。十五年。上在南京。八月。始旋蹕。發龍江。次漁子口。次日。如瓜州。濟江。登金山。如鎮江。過揚州。跬蹕淮安。上戎服簪花。鼓吹入城。又自泛小舟。漁於積水池。舟覆溺焉。左右掖之而出。十六年。正月。

上還京。上初好佛。自號大慶法王。時降旨。亦稱法王名號。傳珪佯不知。執奏曰。大慶法王何人。敢並至尊。大不軌。當誅。上亦弗問。二月。上不豫。寢疾豹房。惟太監陳敬蘇進二人侍。上曰。朕疾殆不可爲矣。天下事重。其與輔臣議處之。前此事。皆繇朕而誤。非汝衆人所能與也。俄而帝崩。敬進奔告。太后。太后召廷和議。恐江彬爲亂。不發喪。先磔誅彬。乃移殯於大內。壽三十一歲。葬康陵。無嗣。太后傳旨。迎興獻王。長子入承。

傳錄金
大統是爲世宗。

明世宗肅皇帝

御諱厚熄。憲宗孫也。父興獻王。封湖廣安陸。上爲世子。大學士梁儲等奉金符至興邸。上發安陸。至都門。禮部具儀。如皇太子卽位禮。以明年壬午改元嘉靖時。獻王與母妃名號未定。上欲有所加隆。於是大禮議起。內閣楊廷和等執漢定陶宋濮王故事。謂爲人後者爲之子。不得顧私親。今上宜以孝宗爲考。而興獻王爲皇

叔。祭告上箋。署名皇姪。而別立益王次子。奉興國祀。進士張璁有所窺見。謂皇上以倫序當立。循繼統之義。非爲孝宗後也。皇上以繼統而尊崇其親。則可以繼嗣。而自絕其親。則不可。今唯別立興獻王廟。隆以帝禮。聖母亦以子貴。尊與帝匹。帝喜曰。此論出。吾父子獲全矣。卽溫旨諭廷和等。廷和持不可。還御批者四。上忽忽如有所恨。始勉從廷議。稱孝宗爲考。慈壽皇太后爲聖母。興獻帝后爲本生父母。不稱皇。而刑

部主事桂萼上正大禮疏與張璁議合又附會者
多人上復命文武羣臣集議命璁萼爲翰林學
士璁等復列十三事以上尚書姚夔與楊慎何孟
春等二百二十餘人跪伏左順門力爭之大呼
高皇帝孝宗皇帝聲徹於內諭退不從上大
怒命下獄戍邊廷杖各有差咸寧侯仇鸞等六十
四人上言三代之法父死子繼兄終弟及今孝
宗有武宗爲子不宜更立皇上爲後孝宗
伯也宜稱皇伯昭聖伯母也宜稱皇伯母獻

皇帝主別禰廟不入太廟尊尊親親兩不悖矣

上悉從之奉

章聖皇太后謁廟

章聖 興獻
帝后徽號也

璁萼等援古禮贊成之賜張璁改名孚敬字懋功

獻王旣已稱帝復稱考而議者并欲稱宗列祀

九廟孚敬萼力爭之而止十七年祀獻皇於明

堂以配上帝復申稱宗之議時嚴嵩掌禮部亦有

難色上不悅著明堂或問以見志嵩恐遂變前

說乃尊文皇帝爲成祖獻皇帝爲睿宗十八

年正月冊立元子爲皇太子第二子爲景王第

傳錄
三子爲裕王。駕發京師。以章聖皇太后崩。將
祔葬顯陵。先幸安陸。卜兆故也。三月丁卯。行宮火。
延及御寢。帝惶遽不知所避。錦衣衛陸炳排
闥入。負帝出。帝出焰中。闈婢焚死者。越三百餘人。行
次亢村。行宮復火。庚寅。抵承天府。舍舊邸。卿雲宮。
幸純德山。降輦稽首。享上帝於龍飛殿。奉皇考
配焉。四月壬子。上還京。五月。奉梓宮合葬於顯
陵。六月。勅仇鸞征討安南。尋服之。時上信脩煉
之術。以陶典真爲神霄保國宣教高士。尋加稱秉

一真人。太僕卿楊最疏。謂黃白之術。金丹之藥。皆
可斲元氣。唯端拱恭默。不邇聲色。則仙壽不期而
至。帝以其語多刺譏。逮訊。益死獄中。二十四年。
叙禦虜斬馘功。加仇鸞太子太保。時虜數犯大同。
宣府等處。鸞爲宰相。嚴嵩腹心。遂冒邊功。而河套
之議起。初夏。言以片言合。上意驟陞鼎貴。欲建
立奇功名。以酌知曾銑者。亦功名士也。累官總督。
陝西三邊。念河套爲古朔方地。地肥饒。久與虜共
之。虜得乘閒巢窟其中。於犯秦隴甚易。欲以十萬

衆逐虜去。而築城增戍。爲計甚備。言見以爲名美。大悅。信以爲必可成功。上惡之。嚴嵩微窺。上指。乃極稱虜不易勝。套不可復。師旣無名。費復不淺。且力詆言擅權誤國之罪。上怒。捕曾銑。誅之。而并棄夏言於市。天下寃焉。二十八年。皇太子薨。謚莊敬。二十九年。八月。虜酋俺答脫脫辛愛等。糾合套虜。大舉入寇。火日夜燭天。至東直門外。執御廐內臣八人去。致書多嫚語。求入貢。上召嵩等會議。俱相顧莫敢發。司業趙貞吉抗言。陛下

宜御奉天。下罪已詔。速獎功赦罪。以作人心。帝悉納之。會虜飽自去。循古北口故道出塞。仇鸞自劾無功。帝優詔答之。進爵太保。三十年。郎中徐學詩。錦衣經歷沈鍊等。相繼劾嚴嵩父子奸貪。俱下獄拷訊。四月。開馬市於大同鎮羗堡。及宣府等處。虜以羸馬索厚值。弗予。輒大譁。甚者朝市暮寇。并羸馬掠去。先是兵部員外楊繼盛。力言其弊。謫杖。至是果驗。乃罷馬市。而復繼盛原官。尋遷武選司。三十一年。虜寇薊州甚急。仇鸞病疽死。大學士

徐階密疏鸞通虜誤國。上大驚，命陸炳會法司擬罪。奏鸞謀反律當追戮，得旨剖棺斬首，傳示九邊。初鸞藉嵩力，媚事不啻厮養，既恃上恩，寵日中。若無嵩者，至是嵩復下石，遂見敗云。三十二年，繼盛劾嚴嵩專政誤國十罪，命杖一百，尚書何鰲受嵩指擬罪大辟，聞者為之痛惜。海賊汪直糾漳廣倭盜大舉入寇，江浙濱海數千里，同時告警。太平同知陳璋統兵敗之，蘇松叅政任環前為蘇州同知，因勦倭有功，特陞是職。督舟師，斬獲無算。後胡宗憲誘降汪直。

徐海等伏誅。自後閩浙倭寇不常。四十一年，御史鄒應龍劾嚴嵩子世蕃，憑勢專利，私擅爵賞。上悟，詔嵩致仕歸。世蕃坐烟瘴充軍。後以交通倭虜處斬。應龍超遷通政叅議。九月，景王薨。四十二年，副總兵戚繼光督浙兵至福建，與總兵劉顯俞大猷大破倭賊於平海衛。海寇悉平。四十三年，以諭德張居正充裕王講官。九月，虜大入寇，歷陷密雲、三河、順義、諸縣，直至張家灣，將攻通州。犯京師，以河水凍而還。繇墻子嶺出邊去。四十五年，上不豫，上

傳錄金
權綱總攬朝政肅然中官欽畏無敢干預嘗黎明
就寢及巳卽興裁決精詳悉當其可好服方士藥
其方詭秘性極燥熱遂火發疾甚十二月辛丑崩
於乾清宮壽六十歲葬永陵 皇子裕王卽位是
爲穆宗。

明穆宗莊皇帝

御諱載厚丁卯改元隆慶詔釋海瑞獄 上在東
宮時素聞其剴直故亟釋之贈卹建言執事死節
諸臣以楊繼盛爲首凡五十五人錄用者凡三十

一人毀齋醮宮殿削奪故真人邵元節陶仲文

卽典

真邵元節
典真之師

官爵誥命下方士王金等獄論死革大

工冒濫諸臣皆首輔徐階緣遺詔及 上旨次第

奉行而忌階者以改父之說傾之階幾中奇禍二

年三月冊立 皇太子一日 太子遇輔臣於

御道西召謂曰先生良苦翊贊輔臣頓首謝曰願

殿下勤學睿音清朗聽者悚悅四年虜酋俺答

孫把漢那吉挾其妻蘭入邊

與俺答
有隙也

總督王崇古

留而撫之曰此奇貨可居俺酋婦素愛那吉及聞

傳金
崇古有存卹恩感愧欵塞縛叛人趙全等獻闕下
誅之封俺答爲順義王諸虜皆解辮受封比諸屬
國於是邊防大弛軍餉皆入帥帑或以啗虜或以
遺京近邊卒餒瘠無復生理識者憂之六年五月
上不豫二十五日召閣臣高拱張居正等至乾
清宮受顧命拱與居正歡然草遺詔擬逐司禮監
馮保使人謂居正曰行且建不世功與公共之居
正笑曰去此闔若腐鼠耳卽功何不世也陰使人
馳報保保得爲備而反逐拱自是居正大權在握

矣。上崩壽三十六歲葬昭陵。皇太子嗣位是
爲神宗。

明神宗顯皇帝

御諱翊鈞癸酉改元萬曆時帝年十歲英姿大
度豁達非常並尊兩宮嫡母曰仁聖皇太后生
母李曰慈聖皇太后慈聖訓上嚴切在諒
陰時講讀儀注悉從輔臣所請同於儒者幾務之
暇留心翰墨元年上居乾清宮見一無鬚男子
假裝內使趨走周章左右執之問其名曰王大臣

本名章龍

首輔張居正與高拱有隙欲中傷之下東廠鞫問而緹騎已集高門矣吏部尚書楊博太僕卿李幼孜言於居正曰此事若果爲之恐朝臣人人自危尋以科道疏救復下錦衣衛會審是日天色晴霽忽風沙雨雹黑霧四塞對面不能相見衆皆駭懼理刑官白一清厲聲曰天意若此可不畏乎遂處大臣斬而拱幸無事繇是居正威望日重臺臣無敢有申言者六年三月上大婚以居正充納采問名使先是居正丁父艱奪情杖戍建言吳

中行趙用賢等至遇婚禮朝議恐難於易吉慈聖亦疑之而居正艷其事被紫橫玉以從事學士王錫爵意憤憤疏以省親告人謂形相君短也錫爵曰吾自知吾父何有於相君乎無何居正請假歸葬葬畢卽還京視事十年卒於京邸上及兩宮俱賻贈有加恩寵莫並俄有發其權橫者上心動遂奉旨抄沒於是申時行爲首輔而王錫爵次之相軋之風旣息皆以和平敦大爲福矣十四年時行請冊立東宮不允寧夏酋哮拜等以巡撫

黨馨查冒糧激變殺總兵張維忠等據其地而全
陝俱震自春逮冬我軍糜費巨萬殺傷甚衆提督
李如松以水攻破之十六年上調攝聖躬逾年
不御外殿錫爵進視朝建儲一疏不報十八年正
月朔申時行等朝賀畢因具疏皇長子九齡矣請
冊立東宮以就學上曰朕無嫡子長幼自有定
序姑俟壯健令出閣讀書尋詔皇長子至立榻右
上手執之時行等熟視良久賀曰皇長子岐嶷
非凡宜早定大計上曰朕知之自是羣臣交章

請立東宮上怒其激聒許以明年後有詔三子
並封王待嫡立嫡錫爵復疏言陛下舊日原無
待嫡之說且元子封王祖訓所無今卽不行冊立
請令出閣豫教上不得已允之二十二年皇長
子出閣講學時倭酋關白攻陷朝鮮表請求救師
出無功上憫東征勞苦議封爵招降之卒以封
使久羈倭遂復寇二十六年將軍麻貴劉綎與朝
鮮夾擊倭寇盡殲之錦山二十七年東征報捷而
潘州復議用兵矣播州賊者土酋楊應龍也世爲

蠻洞土官以有罪反勒兵犯綦江川蜀震動二十八年六月將軍劉綎身先士卒破土月二城應龍同愛妾自縊獲首子獻俘京師二十九年冬冊立元子爲皇太子冠婚並舉冊封諸皇子爲福王瑞王惠王桂王三十一年十二月妖書事發欲傾太子。上怒甚中外危疑幸上意素定召

太子諭曰哥兒汝莫恐不干汝事太子含淚謝

三十三年皇太子第一子生

卽

熹宗愍皇帝

三十

五年京師大水三十六年江浙大水城中架木而

居鄉民鼓舟而竄田室廬井鷄犬桑麻蕩然無復存留詔留稅銀五萬兩鹽課十五萬兩賑之四十

二年福王就藩河南賜賚甚厚四十三年五月初四日驀有男子闖入東宮以挺搥仆守門內侍呼集執之太子親奏下部鞠犯名張差宿有癩疾招成上命止將本內五人卽時凌遲不得波及無辜越數日上幸慈寧宮設低坐於聖母靈

次

時慈聖皇太后崩未逾百日

太子侍座右三皇孫鴈立階

下令內侍宣百官進見

上曰昨有瘋癩張差突

八東宮此是異事。於朕何與。外庭有如許閑說。乃欲離間我父子耶。上問。太子曰。汝有何話。太子云。似此瘋癲之人。決了便罷。不必株連。因語羣臣曰。我父子親愛至矣。外庭乃妄加議論。爾輩爲不忠之臣。使我爲不孝之子。殊爲可恨。上復以東宮語宣示百官。百官謝出。四十六年。邊報甚警。特起廢將李如栢。總遼鎮兵。及杜松屯山海關。八月。海州遙見白虹貫日。如日並出者三。白氣直罩城上。四十七年。邊報愈警。撫順先陷。廣寧繼失。

京師之藩籬已撤矣。四十八年七月。帝不豫。得脾疾。二十一日崩。壽五十八歲。葬定陵。皇太子嗣位。是爲光宗。

明光宗貞皇帝

御諱常洛。萬曆四十八年庚申八月。卽皇帝位。卽

於是年改元泰昌。

於升遐之後。熹宗登極。奉旨部議。羣臣疏請。八月以後。卽爲

泰昌元年。以內帑百萬犒遼東。百萬犒九邊。盡罷天下

商稅及礦稅。撤還中官。上以邊事數告急。乃以

徐光啓督練京兵爲內衛。起陞建儲得罪。鄒元標

劉光復等七人旬日之間中外欣然想望至治初十日帝不豫十二日強起御門視事時鄭貴妃侍神廟疾旣成服託保視爲名未還本宮知李選侍尤被寵爲請封后以結權選侍亦請封鄭爲太后交相引重上心知不可未能顯絕貴妃進侍姬八人而上體始憊矣內醫崔文昇用藥藥固下利劑也一晝夜近三四十起遂支離牀褥間鄭圖太后李圖皇后諸宮侍俱不得近宮禁甚危楊漣左光斗倡言於朝約貴妃姪鄭養性請貴妃

移宮并辭封太后之命養性奪魄而退上疾加甚召見諸臣於乾清宮上倚榻憑几諭以宮中無甚事莫聽外邊閑說因問有鴻臚寺官進藥何在輔臣奏寺丞李可灼自云仙丹臣等未敢輕信上卽命中使宣可灼至言病源及治法上喜命進藥諸臣商確未決須臾乳媪至趣和藥可灼調藥而進乃紅鉛一丸也上飲湯輒喘逆藥進乃受頃之上恐藥力歇復進一丸賜大臣銀幣燒割可灼與焉次日五鼓內宣急召諸臣趨進而

傳錄金
龍馭以卯刻上賓矣。九月朔日。帝崩。在位僅一月。壽三十九歲。葬慶陵。皇太子嗣位。是爲熹宗。

明熹宗愆皇帝

御諱由杅。辛酉改元天啓初。光廟賓天。諸臣哭臨畢。請見皇太子。阻於李選侍不得出。青宮舊侍王安。給選侍抱持以出。諸臣叩頭呼萬歲。請詣文華殿。王安擁之行。輔臣劉一燝掖左。英國公張維賢掖右。內侍李進忠傳選侍命召還。皇太子

者三。都給事中楊漣叱之。共擁登輿。至殿。羣臣禮見畢。請卽日登極。不允。暫居慈慶宮。漣語錦衣賂思恭。嚴內外防護。羣臣合請選侍移宮。左光斗上言。內廷有乾清宮。猶外廷有皇極殿也。唯皇后配天。得居之。今選侍旣非嫡母。又非生母。儼居正宮。而殿下乃居慈慶。名分倒置。臣竊惑之。選侍復擬垂簾聽政。促冊封之禮。與登極並舉。猶於太子前。自稱貴妃。稱太子爲哥兒。楊漣等復力爭。選侍不得已。乃移居於噦鸞宮。九月六日。上始

登極宣諭內閣。暴選侍驕恣不敬諸罪。輔臣方從
 哲封還詔書。御史王允成劾之曰。司馬昭心事。路
 人知之矣。給事中魏大中上言。李可灼之藥不合
 之。崔文昇不備。崔文昇之逆。不遡之。張差不明。方
 從哲之罪。不叅之三案。挺擊紅丸移宮不定不悉。時先後
 彈章甚多。可灼文昇伏罪。元年。帝行冠禮。內使
 魏忠賢。原名進忠矯旨殺太監王安。忠賢河間人。少黠
 慧。無藉。好酒。有膽力。能決斷。與少年賭博。多負。亡
 匿市肆中。少年追之急。因自宮。時。帝為皇太孫。

忠賢事之。甚得。帝心。因私于客氏。客氏。帝乳
 媪也。光廟踐阼。冊。帝為東宮。忠賢得充典膳。
 客氏力也。光廟升遐。御史方震孺請逐客氏。斬
 忠賢。帝令客氏出宮。忠賢發王安鞫問。安素剛
 直。主持宮中事。因詰責令自新。忠賢得釋。尋客氏
 復夤緣入宮。忠賢矯旨勒安自殺。安死。忠賢遂無
 所憚矣。封客氏奉聖夫人。子錦衣衛指揮魏忠賢
 廕姪二人。命戶部擇田二十頃。賜客氏為護墳香
 火之用。命工部於陵工告成。敘錄魏忠賢。吏科給

事侯震賜御史王心一俱降級調外。初客氏出宮復召入震賜等各奏曰。皇上於客氏始而徘徊眷注。稍遲其出。猶可言也。出而再入。不可言也。王聖寵而煽江京李閏之奸。趙嬈寵而搆曹節王甫之禍。可謂寒心。上怒。左其官。詔開內操。鉦鼓之聲。喧闐宮禁。試銃。上前銃炸。上幾危。忠賢裹甲出入。設內標萬人。諫者輒罹其禍。光廟選侍趙氏與客魏不協。矯旨賜死。裕妃張氏方娠。膺冊封禮。客氏譖於上。絕飲食。閉襖道中。饑死。黜成

妃李氏復掩殺胡貴人。上俱不問。四年。都御史楊漣疏叅忠賢二十四罪。疏入。忠賢亦惴惴泣訴御前。客氏委曲調停。遂命輔臣魏廣微條旨。廣微素結忠賢。附爲同姓。漣疏中有門生宰相語。廣微恨之。疏下。切責不少貸。後陳良訓魏大中等。不下百餘人。先後申奏。無不危悚激切。俱不聽。五年。冊封皇五弟爲信王。是歲黃河清。鳳凰集於大蒐山。上祭方澤還宮。幸西苑。忠賢與客氏乘大舟飲酒。上獨與內侍二人泛小舟蕩漾。上身自

刺舟忽風起舟覆。上及二璫俱墮水中。二璫死焉。上救免。詔肅寧縣建坊。賜勅旌魏忠賢。廕弟姪一人。都督僉事。六年。御史張訥奏毀東林書院。在無錫縣。書院爲士大夫講學之所。訥迎合忠賢意。故毀之。決熊廷弼於市。傳首九邊。廷弼經畧遼東。慷慨有大志。以忤姚崇文歸。而遼陷。再出與巡撫王化貞左。而遂失廣寧。皆非其罪。天下爲之冤憤。命脩三朝要典。以挺擊紅丸移宮三案。編輯成書。賜魏忠賢印。文曰。顧命元臣。客氏印。文曰。欽賜奉聖。

夫人。崔呈秀授忠賢黨人姓名。名天鑒錄。黑白顛倒。恣意羅織。首列東林。葉向高。韓爌。孫承宗。劉一燝。趙南星。楊漣。高攀龍。左光斗。孫居相。李邦華。喬允升。王洽。曹於汴。李騰芳。錢謙益。文震孟。姚希孟等。次列東林之黨。孫鼎相。徐良彥。熊明遇。沈維炳。熊奮渭。侯恪等。又列真心爲國。不附東林者。三十餘人。時楊左旣死。御史周宗建。左諭德繆昌期。楊州知府劉鐸。御史李應昇等。俱以忤忠賢下獄。置重典。而魏大中亦被逮。道經吳門。與吏部主事周

順昌周旋累日。臨別涕泗。以女許配其孫。忠賢聞之。并逮順昌。吳民素德順昌。憤極。諸生劉羽儀王卽等。民顏佩韋楊念如等。叢毆緹騎。順昌就詔下獄。許顯純令獄卒私殞之。諸毆緹騎者。巡撫毛一鷺疏聞。佩韋等五人棄市。諸生俱斥革。七年。以皇極殿成。晉姚忠賢上公。原封肅寧侯。魏良卿。晉寧分。兩京浙江山東河南等處。各建生祠。觀。於是。有司曲意獻媚。務窮工作之巧。香肖像祀焉。遵化道耿如杞。詣祠。長揖不

拜。尋下之獄。上幸后宮。見几上書一卷。問何書。曰。趙高傳也。上默然。忠賢怒。誣后父張國紀謀

立。次興大獄。尋以王體乾言。事寢。乘后方娠。

客氏授意暖心宮人。奉御無狀。殞焉。八月。上不

豫。二十二日崩。壽二十四歲。葬德陵。時忠賢將肆逆謀。秘不發喪。皇后密令小內侍。召皇弟信

王入宮。時信王已大婚。賜第宅在京邸。以二十四日卽大位。

御諱由檢。

帝手握乾綱。獨杼宸斷。聰明神武。度量恢弘。卽位

初首正魏忠賢客氏之罪
欽定附璫崔呈秀
等案中外悅服卹忠
不罪善政維新四海頌昇平
矣
詔以明年戊辰
改元崇禎大赦天下

九百八十五年

○自三
至唐堯甲辰共八萬二千七百七十二
年三皇至崇禎戊辰共八萬六千七百五十七

三

